

正
誼
堂
文
集

正誼堂文集卷十六

鄧董沛孟如

墓碣

國子監生陳君墓碣記

維陳氏系出宋太府少卿膏膏籍莆田娶明州汪氏遂家於鄞是生文懿公居仁而陳氏始大元明以來分爲數支北城孝聞坊其一也君諱清源字聖瑞曾祖援府學生以長子國子助教之綱貴贈奉政大夫祖之鈞父鸞竝國子監生祖妣某氏妣葛氏北城陳氏世儒業助教君舉進士以詩文倡後進學者稱旭峯先生先生旣

歿門戶衰羣從遂學賈君父爲巨室司計謀什一之利
以有贏餘君佐其父恢拓基緒故居隘乃遷南城偕弟
鑰源出主廛肆入奉庭闈雍雍穆穆鄉黨稱焉性和厚
與人交未嘗隙末雅好飲酒而不及亂華侈之飾終身
屏勿御也君體弱善病事其兩尊人皆高年歲丙寅母
葛孺人臥疾君率婦子朝夕侍醫藥不敢少懈明年四
月葛孺人歿又明年八月父亦歿期歲之中荐丁大故
哀傷摧抑遂至滅性蓋葬事甫歲而君亦不起矣卒於
同治七年十月二十一日年五十有三嗚呼陰德之逮
子孫遠矣昔太府官御史而會明州有王法恩之亂朝

議屠城太府力爭之乃止方是時臨安建國吾鄉爲藩
輔右郡金人慘戮不過十年流離轉徙之民未有安宅
而重邁斯變延喘息於鋒刃之下此非太府之賜而誰
賜歟君子之澤百世不斬由南宋迄今幾八百年矣而
陳氏之族烝嘗不替其秀者策名於朝猶保其先代簪
纓之緒卽退而學賈亦能砥行飭紀默化於詩書之教
而油油然作其孝悌之心可不謂難哉蓋吾文君之碣
而有感於其先代之遺德也君例入太學娶同縣張敦
初之女生三子曰仁曰義曰禮三女長適袁可材次適
李國照三未字孫一綿祚仁等將以明年癸酉葬君於

墓山里西山之麓而虛其右爲張孺人生壙先期來請
記仁娶於董吾族妹也誼不可以辭同治十一年六月
同縣董沛記

贈文林郎國子監生袁君墓碣記

君諱經字緯地一字葦隄甯波府鄞縣人也袁氏在宋
號望族正獻公變以理學爲名臣

皇朝從祀

文廟其子正肅公甫繼稱大儒兩世並葬陽堂鄉在東
錢湖東山之麓子孫有以守墓居者遂爲湖上袁氏之
始君所居曰弈山亦其後也曾祖文瀾祖應榮父天意

母戴氏君少失怙逮事祖父母二十餘年孝聞於鄉里
昆季三人友愛無閒仲讀書爲叔父後君以長子克家
創宗譜設義田建塾於所居之側教族子弟扁其堂曰
始基而奉正獻栗主祀於中以仿古者祭先師之禮人
皆躋之正獻墓在穆公嶺蕪沒久矣君偕昆季跡其地
履齒所履鏗然作聲負鍤往開視之則楊慈湖所作正
獻墓誌也大喜錄其文而還置之封樹完固以告其宗
族於是袁氏子孫散處都若鄙及鄰縣慈谿鎮海者胥
會於葬所而其右百步爲正獻父通議大夫文墓竝得
而修治焉君以一誠之感通靈於冥漠崇封馬鬣奄還

舊觀遂使先人遺裔三邑千家皆得省視七百年來之墓道而時祭告之可謂孝矣他懿行若周卹振貸之舉具詳家狀中皆於君非難能者其可略也君少筦家政不竟於學而課子若孫綦嚴長君月樓先生吾師也以文行望於鄉三子長孫竝負雋才爲先君子高弟歲丙午先生舉賢書君遽歿歿後數年子孫相繼成諸生一門衿佩聲譽隆起蓋君之遺教有以致之矣自治生壙於縣東丁灣山道光二十六年十月七日卒年六十二初娶戴氏道光元年三月二十日卒年三十四繼娶忻氏咸豐三年九月二十二日卒年六十三先後以次葬

側室王氏亦耐於右子世恆卽月樓先生也候選知縣
世滋國子監生出後君弟萬序俱戴孺人出世濟增生
世淮國子監生世江廩生俱忻孺人出孫順則順賓俱
廩貢生候選訓導順實諸生順祥順祚順禧順祜順祔
順祐曾孫從文從周從武從聖君之葬也於今二十三
年矣諸子惟世淮存將以十月十七日補立君墓碣而
屬沛記之師門舊誼期許良殷自愧蕪辭不足爲君表
也同治己巳九月同縣小門人董沛記

江蘇大河衛千總戴君墓碣記

東錢湖距縣三十里負山注河環而處者不一姓咸豐

八年五月史致芬揭竿起倚湖中覺濟寺爲窟旁近諸邨附之按察使段公光清至甯波役使羣力且撫且勦越六月而事定時則戴君美梁與有勞焉君諱殿元美梁其字自號曰小湖鄞縣大堰頭人也戴氏瀕湖南號巨家難始作君要鄰邨袁氏倡義練勇有從逆者共棄之史黨忻成煥以告致芬怒八月糾眾掠其家粟帛什器無一存者君脫身入郡獻議於段公曰湖民非好亂也特脅從耳相持日久勢當懈公以銳師由中塘河進某約鄉里子弟出肘腋攻之一舉而鳥獸散矣公大喜期以十月君寓郡密屬其親信者潛歸部勒數百人以

待方就緒而君驟病臥不能起猶時時倚牀東向叱咤
強舉手作殺賊狀聞者壯之十月官軍東下戴氏袁氏
爲應火其寨及旁近諸邨致焚遁十一月四日旋獲之
八日伏法公擇鄉民之戰多者犒以千金馳問君疾所
以慰藉之良厚而君之疾已不可爲矣十八日卒於寓
年五十有三行省第平逆功以君之歿也遂不之及云
君少以騎射成諸生循例捐衛千總分發江蘇補大河
衛未任以治喪假歸遂不赴敦行於家建宗祠修譜牒
族人賴之道光癸卯鄞東大水漂棺槥以萬計君所收
者千餘買地葬之時稱其義祖義德國子監生封儒林

郎父璜理問衙祖母母俱忻氏竝封安人君娶忻氏再娶湯氏子一壽祺府學廩生孫二人孫女二人君既歿之明年史氏餘黨復起招台盜爲助與戴氏袁氏相仇殺旬月旋定而大堰頭被焚者凡數百家君之屋亦燼焉壽祺奔行省訴於段公公檄郡縣吏撫卹周至壽祺遂徙於韓嶺同治己巳將葬君於老界鄉高錢之原而壽祺亦卒明年始克葬其戚史昌久介劉鳳章來請記方事之殷也致芬疑余與段公有舊將應公日使人伺於門余避難西走而仲父猶家居史黨王文龍謂仲父亦內應者執所善高承益迫令招仲父通官軍狀夾兩

股幾斷承益堅不承事雖解而偵者不已先太安人乃
挈諸娣諸婦徙慈谿亂平始返回溯舊難十餘年矣痛
定思痛愈不忘任事者之功也同治九年九月同縣董
沛記

錢君籍香墓碣記

光緒丁丑余旣表錢君啟陽之墓越三年己卯其兄籍
香君始克葬於前墓之東哲嗣棠貽書江右請記其碣
逡巡未及作也已歸田重申前請乃敘而復之君諱承
昌字秉文一字籍香鄞人也先世詳啟陽君表中少讀
書資稟絕異十歲通諸經稍長從先大夫遊時稱高足

試於郡縣恆置前列而年逾三十不能博一衿遂不復
試窮年閉戶汎濫史部說部及諸家詩若文露鈔雪纂
靡閒昕夕書法通歐虞兼精篆隸喜爲詩清雅可誦於
世俗酬應寂然無所與也錢氏舊有譜創自空亭先生
尙多缺略君先人得其殘稿從事修輯未成而歿君偕
其弟續之悉心采訪粲然明備八百餘年之系牒始有
刊本慨天下多故著厯朝災異錄以示龜鑑讀史之餘
時有論斷爲雜鈔若干卷此著述之大略也君生平和
厚溫雅無疾言無遽色里社尊敬之咸稱先生而不名
然持守甚正動必以禮嘗與友人入郡城途遇麗者友

人目逆之且恣評罵君微愠曰讀聖賢書何至是邪遂與之絕友人踵門謝乃已咸豐壬子三月十二日遽微疾遽卒年僅四十配夏氏鎮海學生廷燭女恭儉有則能主家政後君二十八年卒是爲光緒己卯五月十五日年六十有七子二長卽棠次鳳翰副貢生出爲啟陽君後女二適縣學生孫錫祺國子監生鄭聖鉅孫一曾孫一曾孫女二余甫五歲卽與君同學十歲能文每有所作君以愛弟視余未嘗不指示得失也今老矣解組還鄉欲問當時朋好而同輩無一存者君之卒且四十年矣回溯舊游蓋不禁潛焉出涕也光緒十三年十二

月同縣董沛記

奉政大夫費君墓碣記

君諱綸銖字烈傳一字桐君浙之慈谿人也先代自吳縣來族姓繁衍以其氏氏地曰費家市曾祖宗李祖文燬父元墀自祖以下竝贈通奉大夫祖妣妣皆夫人君少失怙事母盧夫人以孝聞兄弟五人友愛無閒有廬肆在甬東而伯兄綸鐸自主之君佐其業益以隆起歲損所餘周卹宗黨宗黨德焉遠祖彥京府君日章府君竝葬定林寺側年久失其墓君告於宗老以長至日祀之又出己資祭歷代之冢凡十三世子孫以爲例定林

寺者日章府君所創也其始曰峯山道院宋初改寺額而於東廡祀府君曰峯山祠明代重建顏襄毅公爲之碑及是有欲占其地者君偕諸昆季直之於官祠宇無恙承先人志重纂家譜昭穆世次秩然有條此內行之大略也君負才諳料事多奇中持論嶽嶽無唯阿之態義所當爲必勇赴之咸豐初赭寇亂江淮豐工潰決疆臣踵陶文毅公成法募商船以復海運眾囁嚅不前君慨然曰此

國家大事吾儕食毛踐土何可以畏難阻也請諸伯兄率商賈羣出應命歲轉粟百萬石航之天津京倉恃以

有備粵盜竄海洋肆掠商船要贖金以千計君與其友
鎮海李成九同里盛鳳儀倡言於眾購泰西輪船出洋
剿之數月之中沈盜艇六十八艘殺溺死者二千餘人
盜回粵無敢以一帆一楫入浙洋者商人捐船貨之入
以充經費歷歲不懈費氏一門無慮二十萬金以功敘
五品銜

賞戴孔雀翎辛酉冬賊渠黃呈忠等分道犯甯波郡人
惴惴西洋流氓乘閒焚江東掠奪財貨君急募夷勇列
槍械拒之慶安會館及比近諸肆咸得安堵無何郡城
陷賊設鄉官歛財以自奉次及於君君不可賊怒將火

其廬君避地江北岸與鄞縣陳魚門密謀恢復明年賊
西竄君與有勞焉嘗曰吾邑褊小人浮於田習商賈者
散而之四方欲挽其習非務本不可湖州蠶桑甲於天
下其事可仿行也親至南潯講求樹藝飼養繅洗諸法
作蠶桑輯要一書分送諸鄉首種桑數千株以爲之倡
貧戶育蠶有不能購葉者量給之於是鄰近諸縣聞風
興起至今享其利君卒於光緒四年六月二十三日年
五十有七娶陳氏胡氏先君卒側室某氏均無出以伯
兄第四子鴻來爲嗣葬靈陽邨之西原余與君弟仲倫
交幾二十年雖未嘗識君而習聞其行誼慕備丁亥四

月鴻來謁寓廬再拜以墓文請遂不辭而記之時距君之歿且十年距君弟之歿亦三年矣

張氏典史君庠生君父子合葬記

道光甲辰四月十三日吾友張翊燦葬其祖典史君於翔鳳鄉茂嶼之麓而以其考庠生君祔越九年其祖母朱孺人卒又九年其母董孺人亦卒既奉柩合葬既封樹碣其前而屬余爲記按張氏系出宋文節公知白之後南渡遷鄞爲甬上著姓典史君諱廣聞字維聰一字漁村曾祖照祖燕賓諸生父宗衡天保縣典史母王氏封孺人天保君生四子而家綦貧課徒所入不足以自

給乃襪被出門市藥於都下銖積寸累以有贏餘入資
爲縣尉旣官嶺右命伯子主廬肆而典史君以仲子筦
攝家政伯子與叔子比藥肆之資遂以折閱典史君弗
與校也天保君念仲子孝招之官舍俾習吏事旣而積
廉俸爲典史君謀一官需次廣東得瓊州之澄邁瓊州
古珠崖郡號稱沃饒典史君旣至守令重其樸誠交委
以事而典史君清介自持囊無長物海南地煖裘值不
甚昂一襲之費毋過十緡典史君厯任數年猶以楮衣
卒歲也天保君夫婦歿萬里扶柩歸葬於鄉里於是庠
生君年長矣典史君誨之曰吾家世讀書吾父以諸生

充貢而浮沈末僚不能終儒業吾又以家累廢書箕裘之望將在汝乎故庠生君敦行力學有聲庠序擁皋比稱大師經其指教者率卓有成立學者稱之皆曰春觴先生典史君以道光十二年八月十一日卒年六十孺人朱氏同縣人咸豐二年十二月十七日卒年八十子二長卽庠生君次延榮女二適諸生董昇貢生洪鳴達庠生君諱延榮字申薌春觴其別號也後典史君六年卒是爲道光十七年八月二十五日年四十四配董氏同縣贈中憲大夫名聞女咸豐十年九月二十九日卒年六十六子二長翊耀諸生前卒次翊燦國子監生女

二諸生范顯麓李閑德其壻也昔先贈公與庠生君交而燦自城中徙於鄉居余傍舍爲比鄰耀之子世訓亦諸生又從余遊知張氏世德者莫余若也故不辭而記之

王氏指揮君奉政君父子合葬記

城南五里曰王家橋有冢隆然是惟兵馬司副指揮王君之藏君之子曰方烜以其子正森同知銜得贈奉政大夫從耐於右同治庚午十月葬事歲正森來請記君諱緯字渭風一字幼川遠祖南岐當元代官慶元路定海縣尹卽家定海

皇朝改定海爲鎮海修職郎佐斌自鎮海遷郡城始隸
鄞籍是爲君曾祖佐斌生鏞鏞生丙俱國子監生丙生
四子君其長也少從祖父遊幕於外援例授副指揮需
次選部滯長安者三年居大不易投牒而歸以道光庚
子十一月七日卒年五十一聘洪氏未娶而卒娶李氏
卒於同治丙寅十二月二十一日年七十三生子一卽
奉政君女二嫁同縣國子監生陸乾學舉人孫學馭奉
政君字耿光號曰逸仙年僅二十五後指揮君一年卒
歲在辛丑十二月二十七日也娶其母之姪以節旌於
朝後奉政君十八年卒實咸豐己未十月七日年四十

二正森曰森不幸事祖若父日淺不能具行略庚辛之交郡有英吉利之亂流離播遷而森荐遭大故時則祖母李太孺人揜拄門戶以有今日祖母幸高年而吾母又不幸先逝苦志甘載未嘗享一日安樂之奉是則森之所疚心而滋愧者也余聞其語質而哀視夫造作言語以誣其先人者固已遠矣遂記之

何氏甥墓石記

嗚呼吾甥靈懷之歿蓋於今十有六年矣先伯父生四女長歸於何是生二子而靈懷其長也吾家世鄉籍伯父獨遷城中何氏則居月湖之西距伯父家甚邇而距

吾家東隔江河凡二十五里有大事宜慶弔姊始一來
來不過一提旬輒返甥依其母不與羣兒戲逮六七歲
能讀書知禮敬從舅無失容姊丈廣堂君年長矣而愛
余每過從時其寒煥飢飽惟悉甥及冠學賈甬東余造
其廬肆亦時余寒煥飢飽惟謹余嘗語廣堂君甥樸愿
有父風君可謂有子矣嗚呼吾望其成也而不料其短
命死也夫有知之屬莫不知愛其類鳥獸微也而喪其
羣匹則必翔回焉蹢躅焉哀鳴而不自已此自然之性
也人生作四五十公往往厯溯少時某也親我某也厚
我計其存亡而悲懼應之沉乎甥舅之間相處如骨肉

乎而忍記其墓乎甥名濬哲靈懷其字號曰舫淮鄞人
也祖紹增貤贈徵仕郎父錫元監生卽賡堂君甥出爲
伯父九品銜錫光後其所後母盧氏卒以咸豐己未八
月九日年二十五娶張氏同縣監生永康女子一本禮
監生女二長適孫奎光次未行於是賡堂君年七十六
與吾姊偕老而次甥濬善曉葬事爲其兄營兆卜吉於
縣西潘壘之麓流涕來請記嗚呼吾忍記吾甥之墓耶

正誼堂文集卷十六



正誼堂文集卷十七

鄞 董沛 孟如

墓表

封奉政大夫謝先生墓表

鎮海薛書巖爲其同縣謝明經撰墓志特稱其教子以爲邑人做法故明經六子皆卓卓有成就列縣志文苑傳者二人其一曰緒恆康熙庚子舉人卽補山先生高祖也是生琦祚縣學生爲先生曾祖祖佑績國子監生父簾賢廩貢生貤贈奉政大夫母朱氏贈宜人先生幼有至性孝於事親年十九喪父未幾母亦卒哀毀骨立

見者憫之謝氏爲吾郡望族以科第相嬪而名臣宿學
恆出其中先生席世業受知於寶應朱文定公充弟子
員詩書弓冶以持門戶謹於鄉里篤於嫺戚孚於交友
馴至高年翕然稱祭酒焉先生家綦貧遭先人喪竭蹶
以葬遇祀事先期備物皆體嗜好滌鋤豆鑪鐙之屬不
假他手屈日蚤起躬灑掃堂宇無纖翳肆筵設席薦饌
具如事生衣冠齋肅侍立左右無怠容或館於外雖祁
寒盛暑大風雨必歸朔望拭主櫝焚香以告雖有疴恙
必具服後遷於郡距舊宅六十里歲時謁宗祠省冢墓
雖老耄必親往念先代有丙舍而祖若父無之貧弗克

構恆語其子以爲大感夫觀人之行當觀其大書嚴之
誌明經也詳其教子而其餘略之先生以端重負鄉望
生平無遺玷而其承奉祭祀嚴愍如此尤近代所希觀
余故委曲書之以告世之爲子孫者豈徒以表先生耶
先生名輔袞補山其字以季子官封奉政大夫同治癸
酉十一月十六日卒年八十四配胡宜人同縣廩生鑑
女蚤世無出繼以王同縣昌化訓導曰升女先生之葬
父也用弗繼王宜人善鍼帶以所得貲佐之先先生卒
生三子長驥德道光己酉舉人次馭德三駿德咸豐己
未舉人五品銜縉雲教諭孫一人孫女四人先生之喪

長次兩嗣君已前歿於是駿德自縉雲歸葬先生於東
管鄉宋家橋之右而乞余表之謹次遺事用揭諸阡亦
欲吾郡人做法之也

姚復莊先生墓表

復莊先生之葬也寶山蔣敦復實志之越二十余年宦
遊西江哲嗣景皋等始請表墓乃敘大略以揭於阡先
生諱燮字梅伯自號曰復莊鎮海姚氏生具異稟五歲
能賦鐙花詩稍長讀書十行竝下自經史百家以逮道
藏釋典靡不周覽道光甲午舉於鄉公車北上都中士
大夫及海內名輩爭相延納交日益廣才日益肆著述

日益多於經若禹貢雖指勘補夏小正求是於史若它
山圖經漢書日札於子若息遊園雜纂玉樞經鑰今樂
攷證於總集若蛟川詩繫蚺城唱和詩於別集若駢體
文權復莊詩間疏影樓詞諸書暨院本小說都二百餘
卷傳人也生平足跡徧於江南北而寓鄞之日最久作
文寫畫藉以自給老屋三閒客常滿座閒或擲筭品花
與諸少年爲詩社而甲乙之著錄弟子至數百人徐舍
人時棟評其所作以爲駢體文第一詩次之詞又次之
余則曰詞第一詩次之駢體文又次之先生許余爲知
言同治三年四月二十三日卒年六十墓在本貫剡興

之麓余自弱冠始侍先生詩法皆先生所授今老矣集
已梓行於師門頗爲轉手而淵源所自不可忘也謹表
貞石以報先生先生其猶許我乎至於三代官諱妻妾
子孫爲金石例所應有者具見於蔣君志中故略焉光
緒十年八月門人鄧董沛表

光祿寺署正盧先生墓表

甬上多醇心舊德之士謝山全氏所言若汪泡園林西
明邵雲客諸先生皆

國初遺老也相距二百年風氣日薄高曾規矩漸卽凌
替其有敦勉學行克守先輩之緒以矜式末俗耳目所

及僅可數人幼竹廬先生其一已先生諱杰字卓人世籍鄞縣曾祖培國子監生祖鎬平陽教諭父沂贈儒林郎母范氏贈安人先生少孤貧僦屋以居不蔽風雨而事母盡孝范安人多病躬侍湯藥靡閒晨夕撫一弟一妹寒苦相倚雖縫紉炊爨亦手治之既長好學中道光己亥舉人一赴禮闈以郡國多故遂不復試篤於本支修先祠及丙舍不稍惜力縮衣節食以務推解宗鄒德焉西人屯江北岸將於鐵沙匯開馬道而先生五代祖墓適當其衝乃往見酋長反復辯論酋長鑒其誠允爲改道時顏渠左右剖露數百棺駭慘心目惟盧氏諸兆

域完好無恙蓋先生之所感者深矣咸豐以來軍饑日
亟當事勸率民財寄耳目於鄉大夫以區高下之等而
豪商巨賈爭利微末亦必延衿佩之士主其條約而平
議其曲直膺是任者往往以出入衙市爲鄉里所詬病
獨先生正以律己和以孚眾涉三十年之久未嘗有絲
毫物議自監司守令以洎販夫賈豎之流聞先生一言
無不帖服嗚呼此豈以聲音笑貌爲也其所守者公而
其所養者粹也平陽君爲謝山高第謝山遺書若七校
水經注若宋元學案並藏其家先生益寶守之水經注
佚其半覓得完帙其後王君腹軒校學案刻於馮氏張

君石舟校水經刻於楊氏皆先生所出之稿也先生以
世家舊學爲當道所推重自公事外絕不干以私有兄
弟構訟求爲關說願饋五千金先生曉之曰若以金子
我盍稍益之以予若兄弟若可以無訟矣其人悔悟遂
爲兄弟如初顧先生未嘗以此事語人雖子弟有不知
者而余聞諸訟者之戚屬乃告其嗣君而附於縣志傳
中嗚呼斯可以表先生矣卒於光緒四年八月三日春
秋八十有五以籌餽功加署正銜配黃氏贈安人先先
生卒幾四十年側室陳氏蔡氏子熾附貢生候選縣丞
陳孺人出亦前卒友焜同治庚午副貢生友燾八品銜

俱蔡孺人出孫八人曾孫二人先生自治生壙於縣西
白鶴山之麓歿後兩月友焜等扶柩葬焉貽書江右屬
余表墓念自髫齡始識先生諄諄以學行相勗前歲春
奉檄違故鄉不及半年而先生逝世老成凋喪鄉國之
憂也豈徒爲知己感耶

景甯教諭施先生墓表

施著林先生之歿於今十有八年矣其子念祖來請表
墓維先生於先贈公爲舊契余年十四始謁先生獲與
念祖交兩世通門嘗以賦家言相質正而先生亟賞之
顧念疇昔辱知愛甚摯何可辭也先生諱英楷字式之

號蓮伯蓍林其晚號也先世自明代遷鄞隱德不耀祖
廣勇父毓鳳竝國子監生祖母徐氏母江氏先生少嗜
學與其兄英藻齊名道光丁酉舉賢書三上春官卽不
復試以其學行教授於鄉里邑之達者多出其門性峻
潔意所不可直斥之無假借初應縣試縣之閱文者欲
先生稱門下微示之意而先生不顧也比應禮部試徐
辛庵侍郎方主文柄邑紳或爲之地兩修薦書屬投贊
見之先生亦不之顧也事母盡孝母病恆徹夜侍側母
命之去則潛伺旁舍俟母旣寢而後歸寢兄弟蚤世撫
其遺孤而時振業之皆以成立積祭田所入建祠月湖

規制整肅州黨稱焉先生工四六兼好諸體詩案上常置陸放翁吳穀人二集朝夕披覽故所作近之有集二卷藏於家晚歲習相地書著天元窺管偶譚一卷嘗謂楊曾之術與周子太極說相通而世人多不曉也余少日好遊以酒食相徵逐旣而從軍則雖販屨屠狗之流亦頗結納其時與先生不恆見也乙卯以後杜門卻軌從事於著述或日偶以事見先生先生日子幸矣非具大慧力者能若此乎若吾門某某者真窮而不知返也余心感之嗚呼豈謂過此三數年先生遂不復見乎其歿也以咸豐己未八月二十六日年六十二明年杭州

亂官牘散亡不及以先生之卒咨部部乃選爲景甯教諭距先生之卒蓋已七年初聘李氏未婚歿娶徐氏蚤卒繼娶盧氏以慈惠稱女宗後先生一年卒子四念祖同治癸酉舉人憲祖光祿寺署正慰祖監生慎祖縣學生女二長適監生李江次適廩生江澤霖孫七人曾孫一人葬縣西南獅子港之原以盧安人祔而李徐兩安人則葬於邵家橋先生所營兆也兩墓相距可三里許光緒二年十二月同縣董沛表

贈朝議大夫陳君墓表

同治戊辰十一月二十九日陳明經烈鏞偕諸昆季葬

其先人於東管王家橋之西原未有碑至今二十年矣
光緒丁亥是具行略來請表墓惟明經季子愈溱吾婿
也誼不可辭按略君諱祖贊字鄧泉甯波府鄞縣人也
家世寒儉九歲始入塾資稟絕異一覽成誦遭父喪生
計愈困不能具脩脯遂棄之走奉化山中從梓人遊藝
成而歸爲諸巨家營宅第稍有餘羨慨然曰此豈可以
畢吾生乎復棄之習貿遷業賃宅甬東衣蠶食淡續有
所蓄乃卜芍藥汴之地造屋釀酒以起其家諸子稍長
悉令學賈而命其仲子讀書卽明經也陳徵士勸以經
史教後進明經師之郡有寇難城廂人皆竄不相聞問

君偵徵士所在親負錢帛冒風雪送之性伉爽不輕然
諸長女許張氏甫成約而婿父遽卒家赤貧或問之曰
婚禮重書帖今無之是可改也君曰吾旣許之而可改
乎卒歸之而周卹其困乏歲時弗絕辛壬之交英吉利
陷郡君憤甚徒步謁當道獻攘夷策前定海同知舒君
恭受營餘姚聞而趨之令之行省見撫軍凡獻策者皆
上書君祕其策請以口代關者拒弗納君亟歸命寫官
寫之務得一當以雪中國之恥再過餘姚則諸營方奉
防緝姦軌之命多方詰問幾蹈不測不旬日官軍失律
守者棄營遁君遂從閒道返鄉里自是患怔忡病五六

年不愈旣稍愈矣而其配朱氏又歿君哀悼過甚病復作以道光庚戌三月六日卒年六十有四曾祖開先祖文炳父運嘉皆隱德不仕至君始以四孫愈勞貲銜贈朝議大夫朱氏同縣人與君共艱苦躬自操作終其身未嘗有傭婦以己酉八月十七日卒前君一年也年五十有五贈恭人子四烈釗監生贈朝議大夫烈鏞同治庚午副貢烈鎬烈鈞竝監生女三適張延權楊承鑑李鏞孫九人孫女五人曾孫女三人方夷難之始余年十四五耳卽知江東有兩布衣者一爲君一爲樓君鎬皆義士也樓君聞城陷投江死之君則以策干當事憤不

見用而病病且死以朝不坐燕不與之身而遭際時變
忿激至此視夫高爵厚祿揚揚然賄和者相去何如耶
樓君諸子咸與余善屢乞余志墓未有應也序君之事
爲牽連及之嗚呼可以傳矣

贈奉直大夫王君墓表

郡城東南五十里曰橫溪阻山繚河饒竹木旃果之利
王氏聚族居焉王之先自燕山來南北宋之際轉徙而
貫於鄞遂爲鄞縣人入

國朝以高貲稱巨室族多賢者義聲播鄉國贈奉直大
夫季南君其著也君諱保述季南其字曾祖世英贈徵

仕郎祖士球國子監生贈承德郎考天奇候選州同知
贈朝議大夫妣楊氏封安人贈恭人朝議君生五子君
最少道光乙酉年十九承先人命別其籍事無纖鉅告
諸兄惟謹營二宅擴舊居率中規度朝議君構支祠瀕
就而歿君從諸兄嚴其事癸巳大旱縣中饑復與諸兄
振廩貸之君生平繩準家教自奉甚約而顧卹宗儔禮
意周摯具幹材應事無滯鄉人倚以爲重咸豐癸丑紅
巾盜據滬旦夕謀渡海郡城戒嚴君請於宗老以兵法
部勒團勇佐長吏守事聞於省省下縣第首事者姓名
以次行賞君力辭不受長吏高之又治萬工塘捍一鄉

水忠通象山之道居者行者皆頌其德君例入太學卒
於咸豐十一年七月二十一日年五十五以子錫垌銜
贈階五品配俞氏同縣國子監生仁隆女封太宜人子
四錫堉錫埰俱國子監生前卒錫垌理問銜加二級錫
城國子監生女二長適奉化鄔圻封次適同縣徐寅岑
孫八孫女一錫垌等將以明年辛未葬君於縣東南雙
石嶺之麓竝爲俞宜人治生壙先期述君行事來請表
墓余與王氏嫻也遂次其狀而文諸石同治庚午正月
同縣董沛表

五品銜會稽訓導陳君墓表

道光丙午學使吳公按部甯波所取多才雋時則陳君
樹珊黃君暢園凌君子廉爲職志余亦系名其末三君
皆善余而陳君尤契余以事入郡恆主之三十年來人
事多故子廉成進士最先卒暢園司教景甯不數月卒
於任惟陳君辭會稽之職養疴里中猶得以旬月過從
握手道故舊乃不幸遭子姪之痛纏綿困頓而亦卒矣
君諱政鍾字毓臣樹珊其號先世居鄞縣姜山明中葉
徙慈谿

皇朝康熙中登仕郎德河復遷鄞城再傳至士才以居
積起家卜宅迎鳳里有第士魁蚤世無子乃以仲子後

之是爲君祖諱寅府學廩生贈奉政大夫父諱詔縣學生贈通議大夫祖母楊氏封太宜人母張氏贈淑人君四歲失怙起自孤童溺苦於學以諸生充貢選會稽訓導旋中同治四年舉人紹興遭寇難學署多毀異時爲儒官者傳舍視之君獨捐俸修葺完整踰舊依祠部典例審定先儒位次而增近年所從祀者時舉廢墜不累公帑庠士以私干者悉屏之陳氏故巨家望於鄉縣君席先人蔭無聲色狗馬之好而獨好書儲藏四部數萬卷法書名畫復數千卷讐校同異丹黃相錯又好客春秋佳日召賓朋置酒高會諧笑爲樂兵燹以來貲力稍

遜而諸子羣從以科甲起車馬輻輳不減昔時余以束
髮舊交相好如昆季及與君子姪同鄉薦則當爲君拜
而君第視之如故也君以病乞歸屢過余寓余診其脈
心憂之無何其姪清瑞死又無何其長子昌駿死君哀
抑不自解貌日以瘁甲戌余北行往與君別益心憂之
相隔兩月而君之訃竟至矣卒以同治十三年三月十
一日年五十有七君先以佐振敘中書後以輸饟加兵
部主事預籌海運晉五品銜授奉直大夫配連氏同縣
監生飛鵬女道光十九年十一月十五日卒年二十有
四贈宜人繼配董氏慈谿監生秉恆女封宜人子五連

出者一昌駿附貢生前君一年卒董出者四壽祈布政使司理間壽祚同治六年舉人文禧光祿寺署正藻祥女二皆董出適布政使司經歷吳世楹國子監典簿張祥祺孫四人孫女十一人壽祈等以今年八月二十八日葬君於縣西張家灣山之麓連宜人附左而虛其右爲董宜人生壙奉君遺命先期乞表墓嗚呼鄉國契好存者幾人序君之事不知涕泗之交下也光緒元年三月同縣董沛表

國子監生錢君墓表

余少與錢君籍香同學獲交其弟啓陽君往還二十年

而啓陽君歿今年丁丑嗣子鳳翰來請表墓距君之歿
蓋又二十年矣君諱承昭字二曙以字行改字啓陽系
出宋奉化節度使康憲公億康憲四世孫煩卜居鄞之
青雷山遂世爲鄞縣人曾祖孝達祖友義父汝梅母王
氏君未弱冠喪其先人與伯兄相友愛兄溺於學家政
無纖鉅皆以委君內外井井咸就條理先人建宗祠以
歲歉中輟君請於族祭酒協力成之竝纂家乘以示後
人道光癸卯錢湖隄決平地如巨浸水退又苦旱東人
以病越數年徐公信軒來守甯波召邑之薦紳議復其
舊君慨然出貲爲鄉里倡且鳩工董其役隄以復完性

仇爽與人交不輕然諾戚屬以事相詬爭出片言解之
無不帖服故其歿也或有以微隙構訟者輒太息曰錢
君在吾何至是耶君例入太學卒於咸豐八年正月二
十七日年四十三配丁氏鎮海人側室袁氏無子以籍
香君次子鳳翰爲嗣女一適監生丁宋傳孫四人孫女
三人葬高錢村新河橋之側君以少孤不竟儒業遺言
命鳳翰讀書今鳳翰饒於府庠亦能治詩古文稱一夔
之雋則所以大君門戶者未可量也用表諸碣以旌將
來光緒三年九月間縣董沛表

正誼堂文集卷十七

正誼堂文集卷十八

鄞 董 沛 孟如

墓表

內閣中書舍人徐先生墓表

同治十二年十一月八日柳泉徐先生卒年六十其友
董沛流涕言曰自謝山太史歿吾鄉之學統幾絕先生
以經術文章主盟壇坫後進高材生咸北面稱弟子四
方知名之彥以事之四明者皆願望見顏色出所業相
證問而不佞遊處三十年時以一得之愚請益於先生
而先生時啟發之歸乎一老東南人才所視爲標準者

也。今而後，吾黨之士其誰與爲質耶？先生名時棟，字定宇，一字同叔，學者稱柳泉先生。其先出偃王，在太末者爲大宗。唐光化間，自衢遷台。宋南渡後，自台遷明，遂爲鄞縣人。曾祖嘉獎，祖廷芳，廼贈奉直大夫。父桂林，由武生授營千總。

詔旌義行，贈奉直大夫。母李氏，贈宜人。陳氏，封太宜人。先生爲義行第三子，陳出也。姿性通敏，委已於學，成諸生。充道光癸卯優貢，旋中丙午舉人。以輸餽授內閣中書。自其少時，有志著述，兩上春官，卽家居不復出。湖西煙嶼樓藏四部書六萬卷，盡發而讀之。丹黃雜下，徹夜

不倦對湖居人恆以五鼓望先生鐙火候晨旦鐙滅俄頃而天明矣洎遷城西遭兵火之厄圖籍俱盡乃營新宅購藏如其舊寢息於中老而彌篤著書都數百卷余屢館其家恆出其篋笥之帙而相與討論之故知先生之學者莫余若也先生覃思精誼治經有心得不傍漢不徇宋常主先秦之書以平眾難故不蹈近人墨守之弊尙書湯誓有二一爲伐桀見於今文一爲禱旱錯見於古書梅氏竊取古書以綴湯誥而禱旱之誓湮矣先生正之則有逸湯誓者太誓亡於秦火河內女子所獻亦僞書也近代崇漢學據以爲真先生非之則有三太

誓者言詩音者始自陳第亭林輩繼之往往以漢魏之韻強合古音先生以詩證詩分爲七部而周人之韻著焉則有詩音通避寇建輿閉戶說詩以褰裳爲告密以葛生爲悼亡以猗嗟爲誇壻以資般爲祭太山之詩以下武爲美成王之作其他箋釋雜引諸經解之則有山中學詩記讀充宗之書而嫌其疏也則有春秋規萬讀西河之書而斥其妄也則有舜典補亡駁義四書毛說駁正又嘗補朱輯之逸經校畢刻之呂覽以暨羣經國語皆有論著此則先生羽翼經傳之功也四明舊志宋元凡六家先生購而刊之其考異也曰札記其補闕也

曰佚文其述諸家之傳也曰作者其摭前人之議論也
曰雜錄而山經鄉志之屬以其目附焉曰餘考爲宋儒
袁正獻公請從祀創四明未有之舉詳其本末曰事實
錄考其系代曰世譜略舒氏子孫刊文靖遺集屬先生
審定之先生參核羣書以糾近刻宋元學案之謬曰新
校廣平學案邇年修縣志當事請先生主之商榷凡例
倣史館列傳之體徵引文句各注本書所採踰千種建
議爲貞烈節孝請旌一邑至千餘人而擇其尤著者人
自爲傳以列之新志按訪鄉先正詩文上自漢唐以迄
於元踵諸家耆舊之集而益所未備凡數十冊此則先

生表章文獻之力也。他所撰述若偃王志若北宋譜疏證若家傳若言行記思舊記皆徐氏一家之書亦精確可傳後者先生論文漢以司馬氏爲宗而參以劉向唐以韓氏爲宗而參以柳宗元故所作宏深雅健奄有眾長詩則浩浩直達無門戶之習樂府法漢魏詞近蘇辛其餘事也詩集十八卷已梓行文集四十卷以命其甥葛祥熊刻之我

朝二百餘年經術如惠定宇江慎修王伯申文章如姜西溟惲子居姚姬傳皆元明以來所不易見然而兼是二者自望溪皋聞而外亦無多焉望溪研究義理而不

甚長於考證舉聞則申明漢儒猶是專門守己之學其文章雖無愧正宗而經術則各據一是也先生之文章中立乎方張之間蓋庶幾矣至其沈潛遺經援據古訓本漢經師之家法而於宋代講學諸儒亦闡發不遺餘力信乎其爲通儒也前娶朱氏同縣人道光二十六年十月三日卒年三十三再娶葉氏慈谿人咸豐十年十二月五日卒年三十五先生甫四十立仲兄子隆壽爲後以佐振議敘九品銜後納妾鮑氏奉化人生子隆籌尙幼女四長字舒懋敬次字吏部主事凌忠鎮三字吳世栗四未字孫三人正塘正堤正圻孫女二人先生卒

之明年隆壽以四月朔日葬先生於縣西南王杜畧陳
徵士勸爲之志又明年乃請表墓嗚呼三十年來先生
之益我多矣余幸得稍知古今而不以荒陋自畫者先
生力也先生臨歿猶嗚咽執余手鄭重以遺文相屬今
而後四明之學統其誰繼之耶不腆之文以表先生余
非徒哭其私也已

四品頂戴華陽知縣陳君墓表

光緒戊寅余始至江右東湖陳生鑾光介吾友沈太守
鎔經之書修謁門下北面稱弟子詢問家世知其父華
陽君久宦蜀中以循吏著聲與大府不合罷職閒居資

裝困乏寓重慶不得歸越數年而君之訃至矣壬午夏
長子麟光扶柩回里葬君於本籍三斗鋪北山之麓於
是鑾光具事略乞爲塋道之文誼不得辭君諱枝蓮字
汝金一字薌塍系出江州義門其先有延廣者自江州
遷灌縣傳十數世復遷夷陵遂爲湖北東湖縣人曾祖
士瑀祖鑒增廣生父鴻儒歲貢生曾祖母任氏祖母母
俱黎氏自祖以下竝以君四品階贈封如例君舉道光
癸卯鄉試四上春官不第充覺羅學教習筮仕四川補
雙流知縣量移華陽厯署成都江津開縣涪州敘永廳
捐輸黔饟加四品頂戴晉授朝議大夫咸同之際川省

困軍興監司守令率以籌兵理財博能吏之目一時風氣頗習於操切君獨留心撫字惴惴無華孜孜焉以民事爲亟雙流彭家場者縣之大鎮也閭閻殷闐車馬輻輳先是石達開犯蜀縣募團丁取資於商賈歲入巨萬及達開就俘軍務略定而官若紳私其利沿爲故事君甫下車首檄罷之商民大懽謳頌者不絕蜀州縣初至胥役以名聞進舊有規費多者千金少亦數百金君曰此賊也吾始來而授若以柄乎嚴戒家人屏弗納勤於聽斷獄以時結巡歷鄉村延訪利弊而興革之懸銅鉦於堂有擁闕者鳴以告期月獄頌衰止乃與諸生講明

禮教禁婦女觀劇倡立四鄉義塾慎選生徒優給膏火
設棲流所以安窮民衣被食飲毋缺籌公費歲取其息
爲經久之制雙流人以爲前政所未有也敘永邊於黔
苗回方熾徵調絡繹君支應無誤黔撫曾公璧光嘉其
勞請以直隸州擢用而部議格之廳界萬山民苗雜處
凡互訟之獄前官皆右民苗憤無訴君一判以理羣苗
帖然南有大關當滇黔之亂商旅道梗不足以充部餽
君解橐輸之貽累千計故於其去也貨馬治裝乃克成
行涪州濱大江帆楫往來恆慮劫掠君於蘭市鎮分設
划船晝夜譏查行者恃以無恐州土沃衍莠民好種罵

粟君嚴禁之時方收洋藥稅以贏絀爲功過幕僚咸阻
君君曰吾甯全數賠解額必不願留此種也夏水暴漲
民居漂沒君禱於江岸爲粥食餓者爲舟拯溺者爲棚
以棲老幼婦女之無依者水退徧詣災區列上民數爲
之請振帑不繼出廉俸佐之君之初宦蜀也以籌捐赴
開縣殷殷勸諭未嘗苛勒開人頌焉及將攝開任父老
喜相告曰好官來矣壺漿道迎以得見顏色爲幸君亦
習知其俗禁私錢驅流妓戒燂熬以裕民食嚴刁訟以
端士風江督李公宗義縣人也養疴家居聞君之政曰
豈第君子民之父母吾於陳使君見之丁丑大旱君徒

步禳祝聲淚俱下彌月乃雨而縣已成災君具牒乞振一再上皆不報會罷官遂無有續請之者君天性慈厚七綰州縣以勤卹疾痛爲事省會令長往往苦酬應不親吏職君一攝成都再任華陽寬惠周摯一如其所以治它邑也然遇事有執意所不可無敢干以私鞠獄瀘州脫任韋佗之死與前守余某忤余持之急君曰殺一人以媚太守如天理何吾頭可斷此牘不可改也華陽屈鄉闈上司七易供饋不貲制府吳勤惠憫君貧將畀以善地值解任不果主者私屬君苟能持刺稱門下以千金爲贄當必得也君拂然曰下走僥倖鄉科自座主

外不名他師豈以是辱先人耶聞者失色君遂以常調去而善地卒它屬矣仕宦二十年清苦自守而所在見思每卸篆祖帳塞路敘永之行苗民亦吹竹相送開縣廡累罄囊篋無以償孝廉賀太璞等六十餘人倡率公義集貲填官庫君始獲安然就道云嗚呼廉吏不可爲而可爲其在此耶

中興宰相卓然負人倫鑒者莫如駱文忠曾文正兩公一時豪傑所奉爲宗主也君試於都下出文正之門文正器之其後歷外任箋牒往還勸勉交至厚以循吏相期許文忠督四川調君成都實深倚重君事無小大咸

就商榷君起自單寒以文章政績受兩賢相之知其亦可無憾矣時會變遷雖有以公事劾君者而豈君之咎耶既罷官以麟光方筦重慶津稅遂就養焉光緒辛巳十二月二日卒於寓舍春秋六十有三恭人韓氏歸州人國子監生正進女子三麟光候補知縣鑾光宜昌府學增生龍光女三長適同縣庠生黎長魁次適歸州監生杜培林三適同縣黎長柏孫二人孫女五人鑾光述君事略縷縷萬言它懿行綦備余謂史家之傳循吏者卽一二事足以千古不在瑣屑也而况君之善政亦已侈乎用撮其要俾揭於墓門異時有採吾文入史館者

列之於

國朝循吏之中君庶幾無愧色也是爲表

運同銜貴州龍泉知縣彭君墓表

余攝任清江將值交替紳士安余之拙也陳牒乞留列
名二百二十六人戶部關君耀南運同彭君秉鐸實爲
之首二君與余皆無雅故而彭君冒盛暑躬赴省垣徧
謁當道遂以是嬰疾抵家數旬卒至不起嗚呼其可感
已君字羣昭別字曰建侯江西清江縣人也曾祖明宗
祖詢九品銜父松遐國子監生祖妣敖氏母聶氏自祖
以下皆以君貴贈朝議大夫妣皆贈恭人君少讀書不

屑屑於章句值天下多故慨然有經世之志出遊江淮
周覽形勝咸豐初山左軍興同縣黃公良楷以牧令將
兵屢破劇寇君入其幕襄理文案黃公深器之由諸生
充貢援例授知縣臨清克復潰賊四竄君奉檄剿鉅野
合民團數千分道齊進賊畏官軍而頗易民團君察其
情伏精兵兩翼自引一軍僞張民團旗直薄其壘賊傾
巢出鬪官軍遽易旗賊方駭伏兵已從左右起賊大敗
禽馘無算黃公言於大吏遂以知兵稱從援金鄉從戰
魚臺從破馮官屯從守濟甯及分堵蕭豐邊境皆有功
侍郎勝保勦張樂行久不克檄黃公濟師黃公已擢濟

東道方臥病乃以所部付君將之君督五千人馳入皖北會侍郎之軍力攻正陽關鏖戰兩月克其城追奔四十餘里死者相枕捷聞

詔敘軍功歸吏部銓用戊午籤分貴州團練大臣杜公翻留辦防務請改發山東部議不允而以鄆縣之捷加君運同銜

賞戴藍翎貴州因苗獮所在不靖甲子冬君抵貴陽大吏以其知兵也檄守安平安平賊方熾縣令某避處鄉落君獨入城中募士設防與民團期會聞警卽至或日偵賊來主者遽發信礮民團齊集而實無賊團丁索犒

環城洶洶幾激變君謂同事曰是當理解且以勸後也
登城樓召其部目婉諭再三而量給其賞團丁悅服他
日賊果來民團無不至者前後殺賊以數千計安平卒
無恙乙丑攝開州兼理平越州事平越久陷而開州亦
新復民居寥落四面荒土君以數騎開關赴任修城塹
購器械爲守禦之備招徠逃戶買牛給種以安輯之游
民散勇有不戢者按治毋貸是歲年穀豐登開州民歸
者日眾咸慶樂國黔以軍務停歲科試數年矣君力請
舉行大吏從之兵荒之餘絃誦復作皆君首倡也二年
報政檄監松坎釐稅膺薦疏以同知直隸州擢用又二

年補授龍泉縣下車未幾丁外艱歸旣服闋念太夫人
年高遂乞終養娶同縣羅氏封恭人側室張氏鄭氏李
氏子從益戶部員外郎張出也故張氏受封宜人而鄭
以慈母亦貤封如例君卒於光緒辛巳十月四日年五
十有六太夫人之年已八十乞養家居而不能終其養
嗚呼尤可悲已惟彭氏家世習賈有塵肆在楚中而君
獨好書旣成諸生遭粵寇之亂江右停科鬱遏無所試
遂仗策從軍以武功自奮黃公良楷名將也君久處幕
下盡得指授駸駸以知兵名乃不獲大展其才爲

國家任封疆節鉞之寄而徒浮沈州縣齎志以歿余所

爲歎息不置者豈徒在私誼之痛耶從益卜十二月二日葬君於塋峰祖山之陽具事狀來乞表墓謹述其略用揭諸阡俾後之志能吏者有所攷焉

奉直大夫鄧君墓表

光緒己卯江西舉鄉試余以縣令充分校得五經文一卷絕異之以呈典試汪洗馬鳴鑾吳編修樹梅皆歎賞不置及題榜則新淦鄧福初宿學有名者也越癸未福初成進士觀政農部甫假歸而其父奉直君遽歿福初具行略衰經踵門請爲表墓之文誼不可辭按略君諱培南字植芬一字香巖世居新淦之東郭邨曾祖家璧

祖九皋諸生封儒林郎祖妣李氏封安人父恩林拔貢
生廣昌教諭封奉直大夫妣鄒氏封宜人君以府試第
一補弟子員食餼於庠積久充貢敘團練功授光祿寺
署正銜晉階五品咸豐初粵寇擾東南江右糜爛賊踞
州郡採鄉人之有聞者強畀偽職距之且立死鄧氏稱
右族而廣昌君又鄧氏之望也賊耳其名以偽職污之
廣昌君不受賊怒愈脅之君亟請於賊目願以身代隨
之入偽署夜漏三下則緝守者使就寢而闇行出城遁
於鄰邑作絕命詩置履河干賊蹤跡得之以爲信死也
而報其曾曾曰此子尙不屈況乃翁乎再逼之徒失民

望姑舍之君父子遂免於禍官軍勦賊往往與民團相應賊畏官軍而兼忌民團伺官軍之敗則毒痛之民團勢孤不得已與賊約冀免屠戮俄而賊敗當事者又以民團爲通賊要其罰鍰以助軍餉民團胥病之君父子團於鄉遭兵賊之害崎嶇十年屢瀕於險而卒能保其身家榮被

國恩錫爵秩逾常等嗚呼此非可幸而得之也其所以孚於眾者蓋有素矣內行敦篤待房從均有恩紀先人故舉債躬自償之遺田三頃分畀昆季無所私同產弟歿於都中扶柩歸葬視其子如己子視其孫如己孫一

門孝友傳爲家法故福初諸子咸遵守之卒於光緒甲申十二月二十一日年六十有七配洪氏繼配李氏並封宜人子四福初其長也次福泰府學廩生俱洪宜人出三福崇四福隆俱李宜人出孫五曾護縣學增生曾經曾緒佛生炳生葬縣東左湖邨小山之原余攝令清江距新淦屬兩舍郡中諸君子以公事來謁語及君皆曰長者且知福初之學實君身教之福初能文章當代作者若李學士文田趙縣令之謙交相推重匪獨余嗟異之也有子如此君可以無憾矣

布政司經歷銜贈中議大夫牟君墓表

余與海甯牟敦叔同舉丁卯省試戊辰春相見於京師
聯昆季交過從甚洽至今十七年矣甲申敦叔客南昌
以所撰本生父中議君事略屬余表墓誼不可辭也君
諱成熙字朝衡一字黼堂晚號晦木居士牟氏世籍泰
安宋南渡遷於長興明洪武初復遷海甯高冠橋遂爲
海甯州人曾祖廷樞祖元父翬三世皆謫生自祖以下
皆贈奉直大夫晉中議大夫祖妣沈氏妣王氏皆贈宜
人晉淑人君生有異稟年十二能通諸經大旨承先人
命佐理家政遂不復試博覽羣籍喜讀宋五子書及元
明諸儒書尤以戴山人譜楊園備忘錄爲矩範省身克

已恆自警惕顏書室曰敬慎錄韓公五箴程子四箴范氏心箴於座右朝夕省視非聖之書不以寓目集古人嘉言懿行編爲家訓以教子弟有不率者厲辭訓斥無少假借宗黨嚴憚之此君一生學問之大略也事祖母父母咸盡色養母王淑人晚年得痺疾沈困牀蓐君殫竭心髓料檢醫藥旣遭喪哀毀骨立叔祖久析居而家綦貧君積貲稍裕遂復合之自奉甚約施與輒不吝造杠砌路歲以爲常隆冬風雪中視村鄰有不舉火者量給以米葬族中數十棺與諸長老議建宗祠捐膏沃之田經營祀產雖遭亂未及作而規模已略具矣蓋君

篤志儒先實能體古人之書見之於躬行非徒口說已
也好爲詩與錢唐羅鏡泉秀水高伯平時相倡和有集
四卷兼工書法初學米南宮董文敏晚乃歸於二王求
者滿戶外得其縑素咸以爲寶此則君之餘事耳粵寇
竄浙西君命長子次子徙家於衢而自挈三子避地湘
湖其後浙東亦亂復徙同洲閒關戎馬卒脫身於兵火
中未幾一家病疫死喪相繼配陳淑人歿於寓舍不兩
月而君亦歿矣是爲同治元年七月四日年六十有四
循例授布政司經歷以長子官贈中議大夫陳淑人同
縣九品銜德履女與君相莊稱賢內助云子四長晉祺

運同銜候補同知次鼎禧詹事府典籍三復禮卽敦叔
同治六年舉人江蘇候補同知擢知府出爲從弟後四
升祥國子監生出爲弟後先卒女三長適諸生高溥滋
次適九品銜孫巖壻俱卒女以節旌三適國子監生姜
椿孫七人孫女五人曾孫二人曾孫女一人敦叔鄉舉
之歲偕其兩兄以十二月十八日葬君於海鹽縣橫山
之側墓石未具至是乞余文將歸而刻之昔先贈公性
高峻憤西夷之亂海疆也凡器幣自外域來者一切屏
絕勿藏於家君當辛丑夷警之際上書大府不獲見用
及聞林文忠被逮江甯議款諸事感喟時變淋漓痛哭

終其身霽嶺甌瓊之屬琉璃火齊奇詭淫巧之器不以
充服用蓋與先贈公有同志焉嗚呼此古所謂特行之
士也可以表矣光緒十年冬十二月年家子鄞董沛表

先府君墓表

嗚呼先府君之歿也於今四十七年其葬也亦十有八
年矣不肖沛返自西江始克立石墓門而爲之表古人
所謂將有待者非敢援以例也緩也府君七歲喪怙伯
兄爲前母所出已成立叔季兩弟俱在孩抱母忻太夫
人矢節撫孤以養以教年十三出爲叔父後事嗣母李
太夫人備極愛敬一涕一唾必手承之李太夫人與忻

太夫人不相協戚屬之選事者從而構焉比屋而居幾絕聞問府君怡顏柔氣以一身調護其閒卒使李太夫人感悟重修好於忻太夫人團坐笑語歡若姊妹厯十年之久絲豪無閒嗚呼此難能也旣逾冠縣試第一補府學生以高等食廩餼後生小子尊爲大師問字之屢錯戶外恆滿兩房久別籍及李太夫人之卒季弟亦卒而忻太夫人尙在堂府君篤念本生復與叔弟合居脩脯所得悉以畀之不問其出入也善書初學趙文敏繼學歐陽率更於近人絕肖林文忠求者相踵學使何文安公亟賞之性嗜經訓不甚觀雜書亦不常作詩比不

肖之生也府君頗愛其慧出家中舊藏恣其觀覽而爲之講解不肖甫就塾輒弄筆效吟詠里社之師動色相戒以爲妨舉業府君亦不責也故不肖得稍知文字皆府君有以教之云董氏在宋南渡自河南遷明州始爲鄞縣人明景泰初自郡城遷高塘逮府君之身已十四世府君諱帖字綏之學者稱古山先生曾祖諱義監生妣張氏鄔氏祖諱雲達縣學生妣殷氏沈氏王氏考諱琅乾隆乙卯舉人新昌訓導妣俞氏李氏贈封孺人府君以道光庚子十月七日卒年三十有九初聘於陸同縣監生悌女病足不能行以廢疾辭婚乃娶於邱同縣

監生象柱女耶太夫人既歸則告於君姑曰彼固董氏婦也曷忍其終於陸乎請娶之其病吾視之遂迎以來事之以姊禮謹視其起居食息并澣滌猥瑣事亦不他諉如是者十一年而陸太夫人始卒是爲道光癸巳七月二十一日年三十有三耶太夫人奉兩姑甚孝撫諸孤甚勞苦待房從姍戚甚有恩紀卒於同治癸亥九月八日年六十有一自初喪至百日鄰族婦女焚楮幣者不絕事詳縣志列女傳光緒己卯不肖需次豫章恭遇國慶贈府君奉直大夫兩妣皆宜人子三長卽沛光緒丁丑進士知州銜江西建昌縣知縣次濂五品頂帶縣

學生三治翰林院待詔女三長適四品封吳家齊次適
九品銜馬寬惠三適監生張德峻俱耶太夫人出孫四
人孫女三人曾孫一人曾孫女一人同治己巳十二月
五日葬界牌橋北之原昔歐公參大政封三代爲上公
故卜吉六十年始作阡表其待也宜也不肖艾年登第
僅僅以微官末秩贈及其親上視古人殊益慚忤亦何
敢謂有待耶稽緩之咎固不能告無罪於先人矣光緒
丙戌十月吉旦男沛表

叔父廉卿先生墓表

沛甫七歲受業於叔父廉卿先生性彊記讀書數過卽

能背誦則出從羣兒嬉里中兒十餘輩推爲渠長製紙爲旗飾胡牀爲輿孰導之孰肩之無不惟命竊效官府巡行巷陌以是觸叔父怒恆受朴責如是者三年先公歸自慈谿始受庭訓又四年而先公歿沛年十三能知甘苦自奮於學叔父更憐愛之攝治家政不令預聞恐閒其誦讀也及成諸生開塾授徒叔父齒漸衰乃以簿籍授沛距先公之卒蓋十有四年矣叔父諱昉字于石廉卿其號也世籍鄞縣自祖以上竝詳先公墓表考諱璘府學廩生贈儒林郎前妣侯氏妣忻氏俱贈安人叔父生平以尊祖敬宗爲事數十年中三葺宗祠兩纂家

譜七修厯代祖墓暨父若叔之墓隆冬盛夏躬自監督
不惜勞瘁吾譜創於明景泰萬厯之本久佚亡矣今存
者惟雍正本族祖明儀君所修也願其裔孫流落閩南
絕無音耗叔父訪得之爲之娶婦俾成家室其篤於收
族如此嘗曰祖宗者吾家之神佛神佛者他人之祖宗
今人諂事神佛爲徼福計而於祖宗之事漠然不知豈
有益耶少從先公問學文筆敏捷而試於府縣輒不利
旣壯遂不復試史致芬之變按察使段公光清帥師至
郡與叔父有舊遣人候問史黨王文龍偵之以爲叔父
應官軍也執所害高承益研究其事夾兩股幾斷承益

堅不承乃解未幾官軍平致芬叔父亦獲文龍以功賞
六品頂帶同治癸亥八月十日卒年五十九配郭氏同
縣人監生傳鏞女戚豐辛酉七月七日卒年五十八妾
黎氏廣州人光緒辛巳四月七日卒年六十三無子以
伯氏之子人悅爲嗣孫道林叔父與先公極友愛語沛
兄弟曰他日葬我必依傍汝父庶九原下兄弟常聚首
也故沛治先公之葬卽於其左葬叔父解官東歸樹石
表之并置墓田以奉祀事每念顧我之恩未嘗不泣然
淚下也光緒丙戌十月吉旦從子沛表

季父慰堂先生墓表

同治己巳沛葬先公於界牌橋以神道尙右次其左爲
叔父墓又次爲季父墓皆東嚮光緒乙酉歸自西江明
年立碣表之季父慰堂先生諱岱字穎耕鄞縣人也家
世詳先公及叔父墓表中先生生十月而孤母忻太夫
人尤所憐愛甫周歲與言無父之痛輒淚下不止宗儻
異焉五歲入塾端敏如成人終日危坐未嘗跛倚少喜
汎覽於左氏傳攷訂其世系於毛詩辨釋其名物於四
子書討論其訓詁旣而悔之始取宋元以來儒先之書
朝夕研究以溯聖賢論學之旨越數年遂有所得著澄
心錄一卷其大端以考亭主敬爲宗其入手以二曲悔

過爲要釋老之說理則挾其疵白沙陽明之講學則指其弊近人談漢學者好詆宋儒先生謂羣經之注漢詳而宋略宜師漢四書之注漢粗而宋精宜主宋毋庸以一偏求勝也持論平允洞見千古沛嘗採其粹語別爲家傳故於墓表略之年僅二十三遽卒時道光己丑十月二十三日也配李氏同縣人增生國女二十守節五十旌於

朝今七十有六矣無子立先公次子濂爲嗣濂以諸生預平寇功授五品頂帶前卒孫道楨先生事親盡禮恆恐一息之歟不能慰母氏心其號慰堂也蓋自警云光

緒丙戌十月吉旦從子沛表

正誼堂文集卷十八